



Om jou naaste (werklik) lief te hê...

Teken in om 'n skakel na blitspos te ontvang

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Ek is 'n dosent by 'n tersiêre instelling, en behoort daarom genoeg kennis van my vakgebied te hê om ander te kan onderrig. Om eerlik te wees, dink ek nie ek weet veel nie. Ek dink ek weet baie van 'n klein deeltjie van my vakgebied, en 'n bietjie van die res. Dit is eenvoudig maar net so dat hoe meer 'n mens weet, jy maar alte goed beseft dat jy eintlik maar min weet.

Die afgelope tyd het ek agtergekom hoekom dit so is. Dit lyk vir my dat ek my studies op die verkeerde manier aangepak het. Al die lang ure tot laat in die nag om vir eksamens voor te berei en 'n proefskrif te skryf, was nie die korrekte benadering nie. Daar was 'n makliker manier. Ek moes net aan 'n paar WhatsApp-groepe behoort het en so 'n paar YouTube-video's oor my vakgebied gekyk het, en sou dan baie vinnig 'n spesialis en kenner van my vakgebied gewees het.

Hoekom? Want dit gebeur die afgelope tyd keer op keer. Hierdie metode is bewys. Verskeie persone behoort aan 'n paar WhatsApp-groepe wat "kenners" van entstowwe is, en het ook al so 'n paar YouTube-video's gekyk oor die gevare van inenting teen die Covid-19-virus. En almal is nou viroloë, kenners van hul gebied, en daarom teen inenting vir Covid-19. Party gooi 'n godsdienstige sousie by, en glo daarom dat "die bloed van Jesus" jou teen die virus sal beskerm. Ander weer voeg 'n politieke sousie by, en samesweringsteorieë vier hoogty. Dit is alles 'n plan om jou DNS te verander, en Bill Gates kom vir jou!

Twee opmerkings hieroor: Hulle wat teen inentings is, voer 'n emosionele, onwetenskaplike en oningeligte argument. Skoenmaker, hou jou asseblief by jou lees! Tweedens, onthou maar gerus dat hierdie pandemie nie net vir jou raak nie, maar ook vir ander. Vir almal rondom jou. Hulle wat die Bybel jou naaste noem.

En dit bring my by my punt. In Markus 12: 31 stel Jesus duidelik wat die grootste gebod is: Jy moet God liefhê met alles wat jy het en is, en jy moet jou naaste liefhê soos jouself. Hierdie gebod, toegepas op die pandemie wat ons tans beleef, is eenvoudig. Motiveer ander om hulself te laat inent, soos jy jouself laat inent het.

Nou is die tyd dat die kerk sy profetiese stem moet laat hoor. Ons kan nie stilbly nie. Die kerkleiding, predikante, lidmate en gelowiges moet soos vanuit een koor dit van die dakke af verkondig: As jy jou naaste liefhet, sal jy jou laat inent. So eenvoudig is dit. En weet maar vooruit: Profete is nooit gewild nie.

1 Johannes 3: 18 sê dit so mooi: *Liewe kinders, ons liefde moenie net woorde en lippetaal wees nie, maar moet met die daad bewys word...*

Daarom, maak daardie afspraak en daag op, of stap sommer in. En terwyl jy 'n geselsie met een van jou naaste aanknoop, bewys met die daad dat jy jou naaste liefhet. Die Bybel leer ons immers dat *Wie vir God liefhet, moet ook sy broer (en suster) liefhê* (1 Joh 4: 21).

Dit is wat dit onder andere ook beteken om in Jesus se voetspore te volg...

Lief en leed



Die Labuschagne-gesin

- **Ds HJ (Henk) en Madelein Labuschagne** van Silverton se tweede dogtertjie, Carike, is Dinsdag 10 Augustus gebore. Op die foto is die gelukkige ouerpaar saam met die nuweling en hul eerste dogtertjie, Lileen.
- **Mev Arina Jooste** van die Transoranje Instituut vir Buitengewone Onderwys (TOIBO) is een van die top-25-genomineerdes vir die titel van Kantoorkampioen 2021. Dit is 'n inisiatief van die Solidariteit Beweging. Die algehele wenner word die aand van 2 September aangewys.
- **Die volgende predikante verjaar tot 10 September 2021, en word hartlik geluk gewens:**



Mev Arina Jooste

- Vrydag 3 September: Ds JM (Marthinus) van Staden (46) (Klerksdorp-Doringkruin)
- Maandag 6 September: Ds P (Paul) Buitendag (64) (Volksrust)
- Dinsdag 7 September: Di JJP (Kobus) Müller (82) (emeritus) en DJB (Bouwer) Serfontein (63) (Vereeniging)
- Woensdag 8 September: Di M (Manda) le Roux (54) (Weskus) en WJ (Cobus) Jansen van Nieuwenhuizen (51) (Hartebeeshoek)

Gemeentes en bediening

- **Vakante werkkruimte vir die samewerkende kerke in Harare.** Die NHKA en die NGK in Harare funksioneer sedert 2019 as een gemeente. Dit is 'n tipies stedelike gemeente en bestaan hoofsaaklik uit ouer persone. Daar is ook lidmate wat buite die stedelike gebied woon. Die **vastetermynpos vir drie jaar** kan met wedersydse instemming verleng word. Aansoeke word ingewag van 'n **tweetalige predikant** wat gelegitimeer is in die Hervormde Kerk of die NG Kerk (eredienste word om die beurt in Afrikaans en Engels gelei). Aangesien die skoolopleiding in Zimbabwe geweldig duur is, moet predikante verkieslik nie skoolgaande afhanklikes hê nie.

Die **vergoedingspakket** beloop 'n leefbare inkomste in Zimbabwe, plus gratis verblyf in 'n gemeubeleerde pastorie (insluitende sekuriteit, telefoon, data, water, ligte en 'n bediende) en gratis gebruik van 'n gemeentevoertuig.

Aansoeke moet vergesel wees van 'n verkorte CV met vermelding van die kontakbesonderhede van twee referente, en moet gestuur word na njssteenekamp@gmail.com. Vir meer inligting, kontak die konsulent van die Hervormde Kerk, ds Nicolaas Steenekamp, by 073 279 3315 (RSA); of NHKA oudl Rinus Grau by +263 71 261 1536; of NGK oudl Deon Theron by +263 77 224 6233.

Vergaderings

- Dinsdag 7 September: Bestuurskomitee
- Donderdag 9 September: Kommissie van die AKV
- Vrydag 10 September: Kommissie van die AKV

Kerklike publikasies

- In die **September 2021-uitgawe van Die Hervormer** skryf **prof Andries Breytenbach** dat die Kerk oor baie jare nie die mens se rentmeesterskap van God se goeie skepping ernstig genoeg ter sprake gebring het nie. **Dr Barry van Wyk** gee sy mening oor die beoogde herindeling van ringe, en **mnr Nándor Sarkady**, die Kerk se argivaris, vertel van die NHKA se ringsvorming sedert 1909. **Ds Thomas Joubert** deel met ons sy ervaring van 'n stapekspedisie in die Visriviercanyon. **Prof John Gericke** vra: *Wie is 'n teoloog?* Daar is ook interessante brokkies oor **Gemeente Heidelberg se kerkgebou** wat erfenisstatus gekry het, en die wel en wee van verskeie van ons **predikantsvroue**. Die **September**



2021-uitgawe van Die Hervormer is die vyfde uitgawe wat vanjaar gedruk word. Die drukwerk geskied tans *ad hoc*, afhangende van die Covid-inperkingsvlakke. Die artikels van elke uitgawe word **op die Kerk se webblad** geplaas, en 'n **pdf-weergawe** word ook aan predikante en gemeentes gestuur.

Bybelse Dagboek / Almanak 2021
Nou net R100 (versending uitgesluit)

Kry belangrike inligting oor die Hervormde Kerk én 'n inspirerende Bybelse dagboek in een omslag

Bestel by sentik@nhk.co.za

- Enige lidmaat wat beplan om **van Suid-Afrika na die ring van Dorsland** te reis (gemeentes Gobabis, Otjiwarongo, Grootfontein, Outjo, Windhoek, Tsumeb, Namibkus of Namib-Suid), kan gerus met **mev Sarie Roux** van die Boekwinkel in verbinding tree by boekwinkel@nhk.co.za. Ons ondervind tans uitvoerprobleme, en sy wil graag boeke na die gemeentes saamstuur.

Toerusting

- **Gereformeerde Teologiese Werkgemeenskap (GTW): Konferensie 27 en 28 September 2021**, aanlyn en by Miles Sharpstraat 24b, Rynfield, Benoni. Die doel van die konferensie is om vanuit die Gereformeerde Teologie saam te besin oor die tema: **Die morele hernuwing van die Suid-Afrikaanse samelewing na 'n dekade van staatskaping**. Hulle wil graag persone vanuit die NHKA ook in die gesprek betrek. Sprekers sluit in prof Theo Venter en prof Koos Vorster van die Noordwes-Universiteit, en prof Henk Bakke van die Vrije Universiteit in Nederland. Besoek die webblad <https://rts2021.wordpress.com/> vir meer besonderhede. Die GTW is 'n vereniging wat vanuit die Gereformeerde Kerke in Suid-Afrika ontstaan het en wat ook betrokke is by die vaktydskrif *In die Skriflig / In Luce Verbi*, en is 'n vereniging sonder enige winsmotief. Navrae: Ds Pieter Kurpershoek, 013 243 3364 / 083 641 6466 / pwk@axxess.co.za.

Heilige veerkrachtigheid – hoop vir 'n getraumatiseerde gemeenskap
VTT/VTK 2021

- Gevorderde opleiding in die *Community Resiliency Model (CRM)*
- Aanbieders: Sorika de Swardt en span
- Aanbieding (Zoom of fisies) sal bevestig word

Voldag
27-30 September 2021
Koste
R1 000

Kontak dr André Ungerer by 082 940 8201 of andre.ungerer@up.ac.za om inskrywing te bevestig

'n Gedig

Lente kom

een winter in die skemer draf ek koulik
en dikgetrui al langs die dam
wat soos 'n perskeloot roserig in beroering
van wind en leuterende son onvanpas
haar veel te vroeg in die arms
van die dorpskantoewer lê,
maar voel verras aan my voetsool toe
'n stil bepeinsing van die grond
en hoorbaar op die anderkantste wal
'n gerug wat flikkerend posvat
en al hoe luider van bos tot bos fluister
tot 'n vroeë perskeboom onverklaarbaar verloëmend
in 'n asemrige gebaar die dam se bloeiselpienk
vir haar vergaar

Rosa Smit

(Uit: *Groen. Gedigte oor die omgewing*, 90/3;
saamgestel deur Johann Lodewyk Marais)

Barmhartigheid

- **Loslitdag Vrydag 3 September.** Ondersteun asseblief hierdie fondsinsamelingsprojek van die Nasionale Raad van en vir Persone met Gestremdhede (NCPD). Die afgelope 26 jaar is R400 miljoen deur hulle ingesamel. **Plakkers** kan van TOIBO bestel word by toibo@imagnet.co.za. Vir elke plakker van R20 kan TOIBO 45% hou, en die balans word oorbetaal aan die NCPD. TOIBO lewer die afgelope 74 jaar saam met die stigterslede (die drie Afrikaanse susterkerke) 'n onontbeerlike diens aan die vyf Instituut-skole. Ondersteun asseblief ook die **NHKA se spesiale deurkollekte vir TOIBO op Sondag 5 September.**
- **Rata Maatskaplike Dienste se Drive for a Child-gholfdag** wat geskeduleer was vir 24 Augustus 2021, is weens Covid met al sy beperkinge uitgestel tot **26 Oktober 2021**. Hierdie gholfdag vind steeds by Silver Lakes-gholfbaan in Pretoria plaas. Die fondse wat ingesamel word, is ten bate van elke kind wat tans deur Rata ondersteun en gehelp word.
Koste: R4 400 (Vierbal) – gholfkarretjies, halfweghuisete, aandete, *goodie bags* ingesluit
Putjieborg: R2 500
Vierbal met putjieborg ingesluit: R5 500
Navrae: Charmaine Fourie charmaine@rata.org.za / 071 684 7796
- **Athalia Uitreik in Bloemfontein**
Verblyf vir en versorging van bejaardes en gestremdes
Enkel- en deerkamergeriewe in 'n huislike atmosfeer
Verblyf met 3 etes ingesluit
Verblyf sonder versorging R1 700 per maand
24-uur-versorging onderhandelbaar
(maksimum R8 000 per maand deerkamer)
Navrae: 079 826 6363 / 084 023 0315 / 051 522 6089
navrae@athalia.co.za
www.athalia.co.za
- **Machteld Postmus-behuisingskompleks vir bejaardes** in Brooklyn, Pretoria, het 'n **tweeslaapkamer-woonregeenheid** beskikbaar by Frans Boshoff: Dit is Woonstel 3 teen R485 000. Kontak mev Hannelie Fourie by 012 325 1857 x216 vir meer inligting.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met drie etes per dag teen R4 435 per maand. Vir meer inligting, kontak mev Vicky Muller by 012 386 5310.



- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord**
Kieserstraat 126, Rietondale
Een enkelwoning te koop teen R510 000
Een eenslaapkamerwoning te koop teen R515 000
Een 1½-slaapkamerwoning te koop teen R520 000
Een tweeslaapkamerwoning te koop teen R560 000
Een tweeslaapkamerwoning te huur teen R6 500 per maand
Navrae: Beulah du Plessis by 082 847 9544
Seniordalpta@gmail.com



Fondsinsamelings

- **Gemeente Oos-Londen: Word 'n affiliaal van Nguni Gifts**
Verdien 2- tot 7%-kommissie
Befonds jul gemeente se bediening deur verwysings
Stuur 'n e-pos of WhatsApp-boodskap om jul gemeente aan te sluit
larry@nguni-gifts.co.za
WhatsApp 072 020 8911

Betaalde advertensies in hierdie nuusbrieff

Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrieff geplaas word. (*Tekskennisgewings van gemeentes is gratis.*) Indien 'n jpg-weergawe van die advertensie voorsien word, **moet dit 15,5 cm breed x 6,5 cm hoog wees, resolusie 1878 x 815 pixels, 150-300 dpi.**

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan mev Tessa Oppermann, per e-pos na produksie@nhk.co.za. GEEN advertensie sal geplaas word sonder die betalingsbewys nie.

Die **teks en bewys van betaling** moet mev Oppermann bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaai. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasinge.

Die koste is R250 per plasing (BTW ingesluit). Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, **verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.**

Gebed vir persone met ernstige gestremdhede

Heer Jesus Christus,
U ken die pyn van gebrokenheid.
U het ons swakhede op U geneem
en dit na die hout van die kruis gedra.
Hoor ons bede vir ons broers en susters
wie se liggame hulle faal
en wie se verstand mank gemaak is
deur verwoestende siekte.
Wek diep in ons harte 'n liefde vir hulle,
sodat ons,
vermink en gestrem deur ons sonde,
die gawe van hul lewens kan koester en bewaar.
Mag ons U vind in hul swakhede,
en U behaag met hoe ons hulle versorg.
Want U is Heer, vir ewig en altyd.
Amen.

Bron: Pinterest

(Afrikaanse weergawe: Tessa Oppermann)